

Stručnjaci razmatrali uvođenje poreza na dodatnu vrijednost u BiH

Ured visokog predstavnika je u saradnji sa Gesellschaft für Technische Zusammenarbeit (GTZ) u pretak organizirao prvi od niza seminara za više zvaničnike o pitanju uvođenja poreza na dodatnu vrijednost u Bosni i Hercegovini.

Seminarom je predsjedavao prvi zamjenik visokog predstavnika, ambasador Donald Hays. Na seminaru su sudjelovali ministar trezora, gospodin Ante Domazet, zamjenik ministra financija Federacije BiH, gospođa Šefika Hafizović, te drugi zvaničnici iz Federacije BiH, Republike Srpske i Brčko Distrikta.

Ovi seminari predstavljaju dio procesa prikupljanja relevantnih informacija prije mogućeg uvođenja poreza na dodatnu vrijednost u Bosni i Hercegovini. Seminar koji je održan u petak bio je usmjeren na iskustva drugih zemalja, čija je ekonomija u procesu tranzicije, koje su uvele porez na dodatnu vrijednost, te je zaključeno da je potrebno formirati radnu grupu koja će omogućiti da predstavnici međunarodne zajednice podijele svoja stručnja znanja o porezu na dodatnu vrijednost sa lokalnim organima vlasti.

“Kada i kako lokalni organi vlasti žele uvesti porez na dodatnu vrijednost u svoje poreske strukture je nešto o čemu će sami odlučiti”, konstatovao je ambasador Hays. “To je odluka koju će oni donijeti, a ovi seminari se organiziraju kako bismo im pomogli da tu odluku donesu na osnovu relevantnih informacija”.

Na seminaru su sudjelovali i predstavnici nekoliko međunarodnih organizacija, uključujući i predstavnike Delegacije Evropske komisije i Međunarodnog monetarnog fonda.

Tokom seminara, prezentacije su održali GTZ-ov stručnjak za porez na dodatnu vrijednost, gospodin Eckart Brandt-Pollman, ekonomski savjetnik pri Delegaciji Evropske komisije, gospodin Renzo Daviddi, predstavnik MMF-a, gospodin Emil Sunley i predstvanica Pravnog odjela OHR-a, gospođa Mechtild Lauth.